


REVISTA SITUASAUN NOVEMBRU 2012

ASUNTU NE'EBÉ PRESIZA ATENSAUN IHA FULAN IDA NE'E:

- ▶ Movimentu CPD-RDTL
- ▶ Isu buatus grupu 51
- ▶ Asaun violensia husi ema taka oin metin
- ▶ Tensaun iha Fronteira Oekusi

ASUNTU NE'EBÉ PRESIZA ATENSAUN

Total Insidentes ne'ebé relata



Analiza dados insidenti tun depois de atividade eleisaun. Bele hetan relatóriu insidenti iha www.belun.crowdmap.com

ASUNTU NE'EBÉ PRESIZA ATENSAUN

Movimentu CPD-RDTL

Movimentu grupu Consellu Popular Demoratika Timor-Leste (CPD-RDTL) iha Distritu Bobonaru no Lautem liu-liu iha Subdistritu Fatuberlihu Distritu Manufahi, mais ou menus ema 5,000, mosu preokupasaun fundamental husi komidade mak halo movimentu uza farda militar ho armas hanesan katana, samorai, halo komidade paniku, trauma no tauk, hodi ukupa rai maske komidade balun klaim sira-nia direitu ba asesu ba rai ne'e nu'udar rai adat no rai komidade-nian. Konstituisaun RDTL artigu 146 dehan katak forsa Defeza Timor-Leste iha ida deit mak F-FDTL, no mós iha tinan 2012, Governu hasai rezolusaun ho número 38/2012, 29 Setembru kona-ba regulamentu ba uza uniforme iha nasaun laran mak instituisaun estadu deit hanesan F-FDTL, PNTL, Servisu Migrasaun, Guarda Prizionériu no Guarda Floresta mak bele utiliza. Tanba ne'e ema ruma ka grupu ne'ebé utiliza atributu militar, significa kontra rezolusaun Governu.

Preokupasaun ne'e, sai atensaun husi Governu no Prezidente da Republika inklui Xefi Estadu Maior Jenerál F-FDTL, halo dialogu ho grupu CPD-RDTL no komidade Fatuberlihu hodi hare direta movimentu grupu CPD-RDTL nian. Rezultadu dialogu komidade Fatuberlihu mak fo sai statementu katak sira lakonkorda ho prezensa CPD-RDTL, maske nune'e CPD-RDTL mós mantein pozisaun atu nafatin konsentra iha Fatuberlihu. Rezultadu dialogu ne'e laiha solusaun no Governu foti ona desizaun ba Xefi Estadu Maior Jenerál F-FDTL hodi halo atusaun ba grupu CPD-RDTL, ne'ebé agora movimentu iha Subdistritu Fatuberlihu (Manufahi). Desizaun Governu ne'e, Xefi Estadu Maior Jenerál F-FDTL, deklara katak, atusaun ne'e laos fásil (Timor Post, 14/12/12).



Foto : Evento Dialogu Prezidente da Republika ho grupu CPD-RDTL

Parte seluk, governu presiza halo atusaun, ba ema ou grupu ne'ebé kontra Konstituisaun ou Lei ne'ebé vigora ona. NGO Belun rekomena atu Governu mós tau konsiderasaun ba iniciativa positivu husi CPD-RDTL, nia objetivu kontribui mós ba desenvolvimentu liu husi atividade "Kooprativa hamutuk hodi halo to'os no natar". Ho objetivu ne'e, Governu bele identifika rai ne'ebé hanesan propriedade Estudu nian, no oferese ba grupu CPD-



RDTL hodi halo atividade kooperativa agrikultura hirak ne'e.

Isu buatus Grupu "51" kaer aikulit Aat

Rezultadu monitorizasaun NGO Belun, relata insidente 10 (Novembru) liga ho tendensia konfliktu kona-ba, isu grupu 51 kaer aikulit aat halo ema dun ba malu ka diskunfia ema balu involve iha grupu 51. (Grupus 51 signifika katak, ema pesoal ida tenke iha membru nain lima, bele utiliza aimoruk hodi halo asaun ruma). Liga ho isu ne'e, fontes informasaun balu relata katak, grupu ne'e atrai ema atu involve iha grupu ne'e tanba sira iha espetativa atu hetan poder majiku no informasaun no oportunidade furak hanesan bainhira involve iha grupu sei hemu aimoruk ne'ebé halo ema matenek, bele hetan serbisu, bele halo negosiu diak, no bainhira ema baku no sunu mós la kanek ka mate. Maibé realidade laos hanesan ne'e no buatus liga ba grupu ne'e aumenta tensaun.

Tendensia konfliktu sae makas iha Distritu Ermera, inklui iha Subdistritu Letefoho insidente (7), Hatolia (1), Gleno (1) no mós Distritu Liquiça, Subdistritu Bazartete (1). Iha Distritu Ermera, relata Iha Suku Dukurai, Subdistritu Letefoho, mane nain rua hemu tua hamutuk, nain ida fila ba uma no derepente mate kedas. Nune'e familia matebian deskunfia mane ne'ebé hemu tua involve iha grupu 51 mak halo nia mate. Nune'e mós iha Subdistritu Hatolia, mane nain rua depois han hamutuk, nain ida fila ba uma no derepente mate kedas. Nune'e familia matebian halo reasaun hodi baku mane ne'ebé hemu tua hamutuk to'o kanek todan. Parte seluk, iha

Subdistritu Bazartete (Liquiça), liga ho isu atu hanesan, ema involve iha grupu naran "521" no "551" rezulta insidente membru familia ida ka ema ida halo asalta no lori fatuk tuda familia ida nia uma, ne'ebé rezulta sasan no uma estraga hotu. Impaktu husi familia viziñu no comunidade sira deskunfia ba malu, tauk ba malu, nune'e mós movimentu iha merkadu menus tanba ema tauk.

Atu resposta ba tendensia konfliktu ne'e, NGO Belun koopera ho Padre Parókia no Polísia no monitor Belun iha Letefoho (Ermera) hodi transforma informasaun ba comunidade liu-liu joven sira atu labele fiar ema ne'ebé lori informasaun falsu hodi involve iha grupu ne'ebé laiha koñesementu husi autoridade lokal. Nune'e mós NGO Belun fó sai ona media imprensa liu husi media elektronik hodi fo rekomendasaun profundu ba instituisaun Governu, Polísia, Igreja no comunidade hodi prevene eskalasaun violénsia.

Kontinuasaun impaktu husi insidente veneno lanu alunus iha Lautem

Parte seluk, iha Distritu Lautem, liga ho veneno lanu alunus iha Escola Primaria Iralafae, Aldeia Iralafae, Suku Bauro, Subdistritu Lospalos (Lautem) ha fulan Outubru 2012, to'o agora fo impaktu comunidade sira deskunfia ba malu no bainhira partisipa iha seremonia ruma ema balu prevene hodi lori kedas sira nia bee husi uma, nomos la konsumu aihan ne'ebé prepara ona. Liga ba tendensia konfliktu ne'e, laiha artigu ruma iha Konstituisaun RDTL ne'ebé regula kona-ba atitude ema kaer aikulit at ka veneno, maibe kuandu iha impaktu ba ema seluk bele konsidera nu'udar krime. Bazeia ba knar nu'udar Polísia bele kontinua investigasaun ba insidente hotu hodi identifika motivu husi insidente, nune'e hodi labele fó oportunidade ba ema ka grupu iha hanoin ladiak ba ema seluk.

Asaun Violénsia husi ema taka oin mentin (ninja)

Iha Distritu Ainaro, iha fulan Novembru mosu preokupasaun no tauk husi comunidade sira liga ho atitude husi ema deskuñesidu ne'ebé taka oin metin hodi halo asaun violénsia ba comunidade sira iha tempu kalan, no halo asalta iha dalan, hodi fó impaktu to'o ema kanek no lakon uma no sasan tanba ahi han. Rezultadu monitorizasaun detekta insidente 4 iha Novembru, hotu akontese iha Subdistritu Ainaro Vila, Distritu Ainaro. Insidente ne'ebé fó impaktu ema kanek rezulta iha Aldeia Jakarta, Suku Mau-ulo, iha tuku 8.00 kalan, uma nain rona asu hatenu, nune'e uma nain sai loka odamatan lao iha uma oin hodi hare, maibé derepente grupu deskuñesidu balu hatais metan taka oin metin lori fatuk tuda uma nain hanesan señora ida rezulta kanek iha ulun. Impaktu ne'ebé rezulta ahi han uma akontese iha Suku Casa, iha kalan tuku 12.00, ema deskuñesidu taka oin metin hanesan ninja ba iha familia ida nia uma iha varanda koko atu sobu odamatan, maibé uma nain hakfodak no hakilar. Lakleur uma nain hare ahi han tiha ona uma.

TENSAUN KONFLITU IHA FRONTEIRA

Preokupasaun Komunitade iha Fronteira

Maske autoridade lokal iha Distritu Oecusse, esforsu a'an fasilita diálogu tradisionál entre comunidade Distritu Timor Tengah Utara (TTU) Nusa Tenggara Timur (NTT) ho comunidade Oecusse kompostu husi Liurai, Naijuf, Tobe hodi hametin relasaun no prevene eskalasaun violénsia iha fronteira, maibé nafatin iha ema ne'ebé lakohi kontribui ba dame hodi rezulta insidente iha fronteira husi fulan ba fulan nafatin akontese insidente hanesan fulan Agostu-Novembru (7-2-1-3). Insidente iha fulan Novembru hotu akontese iha Subdistritu Nitibe. Husi insidente 3 iha Novembru, insidente (2) iha ligasaun ba malu tanba odio malu entre ema Timor oan ne'ebé hela iha NTT (Indonézia) ho Oecusse. Dadus hatudu katak iha dia 25/11/2012, ema Timor oan nain 5 ne'ebé hela iha Suku Oepoli – NTT (Indonézia) tama ilegal iha area Suku Bene Ufe hodi kaer ikan iha tasi bainhira tasi maran no ku'u nu'u iha Suku Bene Ufe. Nun'e Polísia Timor-Leste halo asaun hodi deportasi Timor oan nain 5 ne'e fila ba Suku Oepoli (Indonézia). Husi insidente ne'e kontinua mosu insidente iha 27 de Novembru 2012, iha merkadu Oepoli (NTT) Indonézia, comunidade (Timor Oan) ne'ebé hela iha Oepoli halo asalta hodi baku comunidade husi suku Bene-Ufe, Nitibe (Oecusse) ne'ebé liu husi dalan ilegal ba basar iha merkadu Oepoli (NTT) Indonézia.

Refleta ba tensaun konfliktu ne'e, bele nafatin kontinua mosu bainhira nafatin menus elementus UPF (Unidade Patroia Fronteira) iha fronteira atu kontrola comunidade ne'ebé tama sai ilegal hodi hamosu tensaun konfliktu.

ASUNTU NE'EBÉ PRESIZA ATENSAUN

Insidente seluk:

Asaun Violénsia entre Juventude husi 16 (Outubru) sae ba 26 (Novembru) ne'ebé maioria aumenta iha Distritu Dili (13), Viqueuque (2), Oecusse (2), Manatutu (2), Covalima (2), Lautem (2), Baucau (1), Liquiça (1) no Manufahi (1).

Impaktu Negativu husi Konsumu Tua Manas bele halo mudansa ba hanoin hodi kontribui ba violénsia relata (5) hanesan iha Distritu Viqueuque (2), Liquiça (1), Manufahi (1), Dili (1).

Disputa rai (6), inklui iha Oecusse (2), Viqueuque (1), Lautem (1), Baucau (1), Aileu (1).

Violénsia entre Membru Familia hamutuk (7), dekteta iha Distritu Liquiça (3), Manufahi (1), Oecusse (1), Manatutu (1) no Lautem (1).

Asaun Violénsia entre Estudante hamutuk (2), ne'ebé akontese iha Viqueuque (1), Ermera (1). **Violénsia entre membru Grupu Arte marsiais** (2), inklui iha Manatutu (1) no Liquiça (1). **Insidente entre To'os Nain no Animal Nain** (1) ne'ebé akontese iha Manufahi. **Asaun husi Ema Deskuñesidu** relata iha Distritu Oecusse (2). Parte seluk iha Novembru relata mós **Crime Seluk** hamutuk (15).

Husi insidente hotu, nafatin ativamente Polísia no lideransa komunitaria sira halo intervensaun ba insidente ne'ebé bainhira parte ruma hato'o keixa.

RESPONDE BA KONFLITU

Vizita Sua Exselensia Prezidente RDTL ba Distritu

Durante Novembru 2012, Sua Exselensia Prezidente da Republika hamutuk ho membru governu balu halo visita iha Distritu Manatutu, Baucau, Lautem, Viqueuque hodi rona diretamentu preokupasaun husi comunidade, nune'e sai hanesan razaun fundamental informa ba membru governu hodi halo asaun resposta ba preokupasaun comunidade. Vizita Sua Exselensia Prezidente RDTL ne'e sai hanesan mata dalan ba membru governu sira atu banati tuir hodi to'o iha comunidade.



Foto : Belun fasilita mediasaun ba disputa rai ba disputante

Prevensaun Konfliktu iha Komunitade durante Novembru 2012, husi Belun nia poi

- Rede Prevensaun no Responde Konfliktu (RPRK) Subdistritu Remexio (Aileu) fasilita dialógu kona-ba baliza rai entre suku-suku.
- NGO Belun liu husi programa Mediasaun Rezolusaun Disputa (MRD) fasilita mediasaun ba disputa rai ba disputante lima hetan solusaun hodi fahe parsela ba malu.

REKOMENDASAUN

Ministériu Justisa, liu husi Dirasaun Terras Propriedade

- Identifika rai ne'ebé hanesan propriedade Estadu hodi oferese ba CPD-RDTL hodi halo atividade kooperativa hamutuk hanesan tos no natar.

Sekretariu Estadu Seguransa

- Konsidera no tetu rekomendasaun hotu husi sociedade sivil, inklui comunidade iha Distritu Oecusse ne'ebé durante ne'e hato'o liu husi media imprensa elektronik, jornal, alerta tinan ba tinan atu aumenta Elementus Unidade Patroliia Fronteira (UPF) no aumenta ekipamentu komunikaun iha fronteira.
- Polísia presiza halo atuaun tuir prosesu formal, ba ema ruma ou grupu ne'ebé laos F-FDTL ne'ebé hatais atributu Militar, maske presiza

tempu ne'ebé naruk atu resposta ba individual no grupu sira hotu ne'ebé dala ruma hatais atributu militar.

Polísia Nasional Timor Leste

- Kontinua halo investigasaun hodi identifika los ema ne'ebé planeia fo veneno ba estudante iha Lautem no lori kazu liu prosesu formal.
- Halo investigasaun ba rumoris ba isu grupu "51" iha Distritu Ermera nomos grupu "521" iha Distritu Liquiça.
- Aumenta patroliamentu iha tempu kalan iha area ne'ebé comunidade sente laseguru.

Sosiedade Sivil

- Fasilita edukasaun sivika iha baze atu comunidade bele asesu ba informasaun nune'e labele fasil monu ba informasaun falsu.

Rede Prevensaun no Responde Konfliktu ne'ebé eziste iha Subdistritu

- Aktivu koopera ho autoridade lokal, Lideransa relijiaun, sosieidade sivil, governu lokal hodi identifika tensaun konfliktu ne'ebé mosu hodi realiza aaun prevensaun konfliktu ba eskalasaun violénsia.

KONA-BA REVISTA SITUASAUN NE'E

Revista situasaun ne'e relata kona-ba asuntu xave relasiona ho insidente violénsia no tendensia husi koleksaun dadus monitorizasaun liu husi sistema Atensaun no Responde Sedu Timor-Leste durante Novembru 2012. Belun esforsu atu fahe informasaun ne'ebé tuir tempu no serteza. Hanoin katak situasaun bele hetan mudansa ho lalais, ami agradese no simu informasaun seluk ne'ebé bele klarifika ka update dadus ne'ebé ami iha liu husi AtReS. Favor email AtReS nia Program Manager Bylah Da Costa: bylah.belun@gmail.com. Imajen © Izalde Pinto no Alexandre Andrade, Novembru 2012.